

佛說文殊師利淨律經

西晉三藏法師竺法護初譯



清刻龍藏佛說法變相圖

佛說文殊師利淨律經

言十

西晉三藏法師竺法護初譯

真諦義品第一

聞如是一時佛遊羅閱祇耆闍崛山中與大
比丘衆俱比丘千二百五十菩薩三萬二千
彼時世尊與無央數百千之衆眷屬圍繞而
爲說經時有天子名曰寂順律音在於會坐
即從座起更整衣服長跪叉手白世尊曰文
殊師利今爲所在一切諸會四部之衆天龍
鬼神釋梵四王皆共渴仰欲覩正士咨講妙
辭聽受經義佛言東方去此萬佛國土世界
名寶氏佛號寶英如來無所著等正覺今現
在演說道教文殊在彼爲諸菩薩大士之倫
宣示不及天子白佛唯願大聖加哀垂威令
文殊師利自屈到斯所以者何文殊師利所

說經法開發結闍靡不燿然踰過聲聞緣覺之上文殊師利說大法一切衆魔皆爲降伏諸邪迷惑無得人便諸外異道莫不歸命其貢高者不懷自大未發意者皆發道心已發道心立不退轉所當受者無不稽顙所當執御靡不攬持如來至真皆亦勸讚因此聖教乃令正法長得久存自捨如來未有他尊智慧辯才頌宣典誥如文殊者也於是世尊見寂順律音天子之所啓白爲一切故則發大哀演兩眉間毫相之光其明普照照諸三千大千佛土通達周徹一萬佛土大光照耀寶氏世界時彼佛土諸菩薩衆前問其佛是何感應先現此瑞寶英如來告諸菩薩西方去此過萬佛刹有世界名忍其佛號曰能仁如來至真等正覺今現在講法演眉間光照

萬佛土普耀此刹菩薩問曰唯然世尊何故放光佛言無央數億百千菩薩會彼佛土釋梵持世及四部衆皆共傾望文殊師利欲得奉觀諮講經法悉俱白佛奮斯光明遙請文殊師利寶英如來告文殊曰汝往彼土能仁如來延企相待衆會無數遲想相見稽首思聞欲聽稟受文殊白佛吾亦尋知此光瑞應於時文殊與萬菩薩禮寶英佛右遶三匝猶如壯士屈伸臂頃於寶氏刹忽然不現立于忍土在虛空中不現其身僉雨天華遍大衆會華至于膝時諸會者怪未曾有皆共白佛言此何先瑞而雨天華佛告諸族姓子此文殊師利與萬菩薩應命俱來在于虛空雨於衆華以供養佛衆會僉曰願見文殊及諸菩薩若能親觀如是正士甚爲欣慶難值難遇

說是未竟文殊師利與萬菩薩便即現身稽首佛足右遶七匝各以威力神足變化作大蓮華自處其上寂順律音天子白佛願發聖教令文殊師利敷演道化衆會踣蹠欲聞訓誨佛告天子自恣汝心便可稽問寂順律音則白文殊寶英佛土有何奇特超異之德至使仁者遊居樂彼文殊告曰不興貪欲亦不滅之不起瞋恚亦無所盡不建愚癡亦無所除不造塵勞亦無所壞所以者何無所生法亦無所盡又問其佛說法何所興爲何所滅除答曰其本淨者以無起滅不以生盡所以者何彼土衆生了真諦義以爲元首不以緣合爲第一也又問何謂真諦元首何謂緣合以爲第一答曰於義無起亦無所壞無有相處亦不無相亦非一相亦不離相亦不顯相

彼無視者亦不無視亦不諦視亦不有盡無能盡者已無所盡不可盡者是曰真諦義義者天子謂無心矣無本心者不教他人不於此際不度彼岸不在中流是真諦義義者天子謂無文字乃爲聖諦所以者何如佛言曰一切音聲皆爲虛僞天子又問如來所說將無欺乎文殊答曰如來所說無誠無欺所以者何如來於二心無所住而於有爲無爲之法無有言辭由是之故無誠無欺於天子意所趣云何如來之化設有所說爲實爲虛答曰不誠不欺所以者何如來之化不有四大亦無誠實文殊答曰如是天子一切諸法皆亦如化自然之行如來所解無所成就亦無所住以是之故所宣講法不誠不欺歸于無二又問何謂如來說真諦義文殊答曰真諦

義者不可稱說所以者何其義趣者無言無說亦不可得說是真諦義時五百比丘漏盡意解無數千人遠塵離垢於諸法法眼淨萬二千菩薩逮得無所從生法忍

聖諦品第二

寂順律音問文殊師利其真諦義甚爲難解文殊答曰如是天子其懈怠者於真諦義甚爲難解又問何謂比丘精進答曰無所斷滅亦無所除而不修行亦不取證是爲比丘奉行正義所以者何其自念言斷滅如是除去若此修行取證則爲懷想顛倒放逸衆行俱合又計斯者非正精進又問何謂正精進乎答曰其等無本及與法界等於五道亦復如是如等無本及與法界於六十二邪見亦如凡夫之法學法不學聲聞之法緣一覺法佛

法亦如如等佛法生死之法其泥洹法愛欲塵勞諍訟顛倒亦復如是比丘若茲精進行者乃正精進又問何謂所行平等如等佛法乃於愛欲塵勞之義亦等諍訟顛倒之事文殊答曰用空無相無願等故所以者何空者不別無有若干猶如天子坏瓦器內空及與寶器之內空者俱同等空無有若干不可言二如是天子愛欲之空及與諍訟顛倒之空上至道空彼則俱空無有若干不可名二也天子又問何謂菩薩修行聖諦文殊答曰假使菩薩不行真諦何因當爲聲聞說法所以者何菩薩行諦多所察護聲聞無護菩薩行諦廣大難限聲聞偏局菩薩行諦將護衆生而於本際無所造證菩薩行諦善權方便不捨生死泥洹之門菩薩行諦普觀一切諸佛

言十

五

之法猶如天子有一士夫竊捨大師馳逸奔走獨身無侶心懷恐懼渡於曠路不敢復還聲聞如是意懷惶悚怖畏生死不護衆生不能堪任遊渡一切終始之患獨自行諦不護佛法離權方便無有慧侶不亦然乎猶如天子謂彼大師多獲盈利費無量寶瓊琦異珍賜衆賈人超越曠嶮菩薩如是亦如大師積行無量道寶無限修於大慈無極之哀真諦聖慧饒益一切無數辯智以爲傲富遊一佛國復遊一國六度無極攝行四恩以濟危厄矜救衆生還入生死善權方便修行聖諦度諸未度解諸未解周旋三界獨步無侶開化未聞使入大乘猶如天子垢穢弊衣以思夷華黃白須臾而用熏之香氣不久尋便歇盡聲聞緣覺行諦薄妙亦復如是便中滅度不

修所願不至於佛戒定慧解度知見事度脫之香亦復不能降伏罽毼塵勞之欲猶如天子細軟妙衣其價百千以天殊特珍寶諸華白千萬歲熏此好衣其衣常香香氣普流巍巍芬馥未曾有歇諸天世人皆所愛樂菩薩如是從無數劫行諦法香不具所願不中滅度而常演出佛無上道戒定慧解度知見馨降伏罽毼塵勞之欲遊於天上及至人間天龍鬼神諸阿須倫君子庶民莫不奉敬而欲見者恒弘濟度寂順律音天子復問文殊其寶英如來至真佛土聲聞之衆爲如何乎文殊答曰不御篤信不從他教不行於法不毀法界亦不八等離於八邪不須陀洹皆度一切恐懼惡趣非斯陀舍來化衆生非阿那含於一切法無所往來非阿羅漢而皆受於三

千世界供養之利不離於欲亦不以欲而見
惱患不離瞋恚不以怒恨而見焦然不於衆
生而懷害心亦無所憂不離於癡不以愚騃
而爲危難滅除杳冥及一切法不離塵勞慙
懃精進化去一切衆生愛欲逮得高節無所
從生而遊現生於諸想念開化衆生不計吾
我及與人壽悉無所受亦無所捨淨畢一切
人民所施衆祐之德無意無念以修意止奉
四意斷不起不滅行四神足身意寂然導于
五根曉了一切衆生本原行于五力降伏塵
勞念於覺意解平等慧靖修道教棄捐邪徑
證于道訓不得無爲遊趣寂寞而行本際觀
於所觀僉入法界滅於無明盡于愚癡興于
聖慧無上正眞而除於三解脫之品則以肉
眼皆見衆生一切佛土諸佛世尊所化人民

則以天眼觀于五趣生死往來周旋人民蚘
飛蠕動蚊行喘息形物之類之所歸生則以
慧眼察知一切衆生之儔心行所念則以法
眼覩見三世三界羣萌一切人民所可行者
則以佛眼皆用明觀一切諸法法藏祕典聖
曜所照則以天耳遙聞諸佛所宣經法以無
念慧念知過去無央數劫之所更歷而以神
足遊於無量諸佛國土靡不周遍盡于諸漏
不至無餘修解脫也而現其形無有色身有
所講說不演文字有所思惟無心想著示於
顏貌姿豔端正以相莊校衆好若干而以功
德自嚴其體威神殊絕無能當者名稱普流
功勲闡布通于三世無所蔽閔以咨嗟慧而
爲馨香自熏其身則於世法而無所著不爲
塵勞而見染汙惡口麤辭不能毀之則以神

通而自娛樂博聞無厭班宣辯才爲師下吼以智慧光靡所不照聖明之達而爲雷震滅除閉塞幽隱之愚所說無盡通解總持佛所觀察聲聞緣覺所不知處常見諸佛覺意如海三昧之定猶須彌山忍辱柔和等之如地勇猛之力降魔官屬棄諸外道安樂自在如天帝釋喻若梵天心得由已無有儔匹求比難比而無等倫亦如虛空不可爲喻靡所不周無所不入天子欲知寶英如來所生國土聲聞之衆其功德勲復超於此如吾所歎不可計量文殊師利說是語時五百比丘五百比丘尼五百優婆塞五百優婆夷五千天子未得道證發心白佛世尊我等願生於彼寶英佛土得爲聲聞文殊答曰諸族姓子不可以懷聲聞之心生彼佛土汝等當發大道之

心乃至彼土應時受教皆發無上正真道意佛悉記說當生彼土

解律品第三

寂順律音天子復問文殊何謂聲聞律何謂菩薩律答曰受教畏三界難狀患惱者聲聞

言十

之律護於無量生死周旋勸安一切人民蚊行喘息蠕動之類開導三界決其疑網衆想之著是菩薩律惡狀積德以用懈廢不能自進是聲聞律興功爲德不厭諸行以蓋衆生因而得濟是菩薩律滅除一切塵勞之欲已身所惡是聲聞律攻伐一切衆生塵勞恩愛之著是菩薩律不覩諸天心行所念所志不同是聲聞律自見三千大千之佛國土根心所歸是菩薩律但能察已心之所行是聲聞律普見十方諸佛處所衆生心念是菩薩律

唯照已身志性所趣是聲聞律光于一切人民之行蛸飛蠕動心念思惟三界之居各有本末是菩薩律難以將護一切衆魔是聲聞律降化一切三千大千世界諸魔官屬壞衆魔行能受正法是菩薩律如毀破碎瓦石之器不可還合小志之德滅度如是不進正眞是聲聞律猶若金器雖爲破敗終不遺棄即可還合以爲寶器大士現滅深慧法身永存不朽不增不減續現三界是菩薩律若大火燒山林樹木莫不燔燎禽獸馳竄小志若茲言十畏三界難藏隱泥洹是聲聞律樂于生死獨步三界意無怯懦欣心娛樂道法之樂勸化衆生亦如苑囿遊觀之園華實茂盛多所悅豫是菩薩律不能斷除羣礙繫結之難而有處所是聲聞律摩滅一切弊蓋之患永無止

處是菩薩律取要言之而有限節自繫縛身以有限德而見成就戒定慧解度知見事不能具足無極大道是聲聞律所接玄邈志如虛空功勳無量戒定慧解度知見品不可稱載是菩薩律爾時世尊歎文殊師利曰善哉善哉快說解此諸菩薩律文殊聽吾引喻重解令是義歸廣普究竟猶如二人一人歎譽牛跡之水一人起立咨嗟大海積水之功於意云何其人歎譽牛跡之水能久如乎答曰牛跡之水甚爲少少不足稱譽佛言文殊聲聞之律所見威神亦復若茲如牛跡水不足稱譽彼人起立嗟嘆大海能如何乎答曰甚多甚多天中之天其大海者無有邊際不可齊限深廣難計佛言菩薩之律當作是觀猶如江海不可訾量佛說是時二萬二十人逮

得無所從生法忍異口同音皆而歎曰我等
世尊當學於斯菩薩之律開導發起無央數
人寂順律音天子復問文殊師利文殊爲學
何律爲修聲聞緣覺之律若菩薩律文殊答
曰於天子意所志云何其大海者爲受何水
捨置何水答曰其大海者無水不受報曰如
是天子菩薩之律猶如大海不逆汙塗十方
諸律靡不歸之聲聞緣覺一切衆生開化行
律而普遊之天子又問文殊師利所言律者
爲何謂乎答曰所言律者開導教化恩愛塵
勞故曰爲律曉了貪欲故曰爲律天子又問
何謂開導恩愛塵勞何謂曉了於貪欲者答
曰衆念思想計有吾我處于諸見不棄顛倒
不捨不明愚癡之本行于二事興發塵勞分
別此者是謂曉了貪欲也彼若修行無貪思

想淨導隨順不計吾我不住諸見捐捨顛倒
棄除無明愚癡之冥不爲二行塵勞不興亦
無諍亂無諍亂已究竟永安是謂開化塵勞
之律譬如天子其有術師明識能知毒虺種
類便以呪術除去毒害學者若斯設能分別
塵勞本末無有根源則能消滅塵勞恩愛天
子又問何謂開化塵勞本末之律答曰於衆
想念本末所行無有想念則不興諍已不興
諍則無所著已無所著則無所倚已無所倚
則無所住已無所住則無惱熱已無惱熱究
竟被教而蒙度脫此謂爲律設使天子以賢
聖慧玄妙之智曉了塵勞恩愛之本虛妄空
無無所是在無有常主亦無所屬無所從來
無所從去無有處所亦無方面無內無外亦
不兩間亦不積聚無色無像無有形貌是爲

曉了塵勞恩愛之本天子又問塵勞云何而蒙度脫爲實爲虛答曰猶如有人卧出夢中毒蛇螫之其人苦痛不能堪任尋時便服除毒之藥其毒即滅痛惱休息於天子意所趣云何其人審爲毒蛇所螫爲虛事乎答曰爲虛不可言實又問設使虛者何故被毒而蒙藥除答曰如虛妄夢夢虛不實而被於毒毒除亦然亦無所除文殊答曰衆聖解空開化一切塵勞恩愛亦復如是如天子問何謂開化塵勞恩愛爲實爲虛欲了此義如我之身計無有身恩愛塵勞實無恩愛亦復若斯設使我身是實身者恩愛塵勞亦當常存所以塵勞無塵勞者用我已身無有身故由是之故無有能得開化塵勞所以者何一切諸法皆爲寂寞而無生故諸法憺怕不可受持故

諸法靜默無歸趣故諸法皆盡無積聚故諸法無盡無所生故諸法不生無所成故諸法無成用無造故諸法無作無所爲故諸法無爲用無我故諸法無我用無生故諸法無主如虛空故諸法無來無所著故諸法無去從無住故諸法無住無所受故諸法無受無所著故是故天子究竟蒙化爲法律亦無所化

道門品第四

天子又問一切諸法以何爲門之元首也答曰無順之念以爲門首周旋生死順義之念爲泥洹矣不行精進爲罣闕門精進之行爲道品門狐疑之行爲陰蓋門勤修解脫無罣闕門思想諸著爲塵勞門無所想念無有虛妄無恩愛門諸亂多念衆妄想門寂然之行

言十

十一

爲憚怕門六十二見爲憍慢門修於空無無
自大門隨惡親友爲惡罪門從善親友爲善
法門衆邪見事爲惱患門正見之義爲安隱
門慳貪之事爲貧匱門布施之義爲大富門
毀犯戒者便當歸趣諸惡道門奉修禁戒當
歸一切生善處門喜諍訟者違失法門若忍
辱者得歸殊特超異之門爲懈怠者心垢穢
門遵行精進爲無垢門放逸之事爲亂意門
一心之事爲定意門惡智之行癡冥之感如
牛羊門修智慧者三十七品爲道法本師子
之門而悉具足慈心行者無所害門悲哀行
者志和雅門性以和柔無諛諂門而行喜悅
樂法樂門修行護者無所適莫無增減門行
四意止不失宿德諸所福門四意斷者順平
等門四神足者心身輕門五根行者篤信之

義爲元首門五力行者不爲塵勞及諸愛欲
所玷汙門七覺意者悉已曉了平等慧門八
道行者棄捐一切衆邪異徑迷惑之門復次
天子計於菩薩爲諸佛法元首之門將護諸
法法自在門故善權方便曉了處處無處之
門故智度無極言十通知一切衆生心念十三所合隨
順度彼岸門故六度無極攝於六欲令無所
處爲大乘門故觀求於空三界如化終始如
夢智慧明門故一切諸法皆爲本無法無生
忍明達自然無所不了其慧不依他人明故
也天子又問文殊師利何謂法界之門乎答
曰其法界者則曰普門又問其法界爲何所
界答曰一切衆生之所界者名曰法界又問
其法界者豈有分際文殊答曰虛空之界寧
有分際乎報曰不也文殊答曰猶如虛空無

有分際法界如是亦無分際天子又問曰豈可分別於法界乎答曰其法界者不可分別天子又問仁者何因解明諸法乃能曉了如斯辯才文殊告曰於天子意所趣云何其呼響者而有音出以何解法天子報曰其呼響者不解諸法以緣合成乃響出矣答曰如是天子菩薩皆因衆緣故而有所說天子又問仁者爲住何所而有所說答曰如來化住有所講說吾之所住所演若斯問曰如來之化法無所住而有所說答如如來化於無所住而有所說吾之所宣亦復如是設使文殊於一切法無所住立而有所說仁何所住成於無上正眞之道爲最正覺乎答曰吾住五逆乃成無上正眞之道又問文殊其五逆者爲住何所答曰其五逆者無有根本亦無所住

又問如來說言其作逆者無間可避不離地獄答曰如是天子如佛所說其作逆者當墮地獄若菩薩住於此五逆疾速無上正眞之道何謂爲五假使菩薩慙慙至心發大道意去小乘心而不墮落聲聞緣覺之地是第一言十逆發心廣施一切所有無所愛惜不與慳貪而共合會是第二逆而發慈心一切衆生吾當度之不中懈廢是第三逆見一切法無所從生尋便逮得無所從生法忍不復中興六十二疑邪見俱合是第四逆所當知見所當斷除所當班宣所當成覺發意之須悉知見覺靡所不達而無所住成一切智不著三界是爲五逆文殊師利謂其天子菩薩已住於是五逆爾乃疾成無上正眞之道爲最正覺天子又問所說何謂逆不成逆順不成順答

